





5752

RB 177417



*Presented to the*  
LIBRARY *of the*  
UNIVERSITY OF TORONTO

*by*  
**Professor**  
**Ralph G. Stanton**

P. 3680



Digitized by the Internet Archive  
in 2009 with funding from  
University of Toronto



JOSEPHI MAGNANIMI  
LUSITANORUM REGIS  
STATUA VOCALIS,

AUCTORE  
ANTONIO PERERIA FIGUEREDIO,

REGIAE CURIAE CENSORIAE DECENVIRO ORDINARIO,

ET


REGIS IPSIUS AB EPISTULIS LATINIS.



OLISIPONE  
EX TYPOGRAPHIA REGIA.

ANNO MDCCLXXV.

*Cum Facultate Regiae Curiae Censoriae.*



THE UNIVERSITY OF CHICAGO  
PRESS  
CHICAGO, ILLINOIS

1955  
PUBLISHED BY THE UNIVERSITY OF CHICAGO PRESS  
CHICAGO, ILLINOIS



UNIVERSITY OF CHICAGO PRESS  
CHICAGO, ILLINOIS  
1955

# PRAEFATIO.



**V**OCALIA per Prosopopoeiam Opera multa novinius antiquitus in Graecia fabricata. Nec vocalia tantum simpliciter; sed quae in prima etiam Persona Spectatores suos non inenuste adloquerentur. Sic apud Herodotum in vita Homeri antiquissima Statua:

*Enarrabo Midam cunctis hic esse sepultum.*

Sic apud Pausaniam Libro v. capite 20. OEnomai in Elide Columna:

*Hospes, Ego illarum pars sum servata domorum.*

Sic apud Platonem in Hipparcho Statua ejus Mercurialis, edisserens quod in media urbe populoque steterit.

Sic servatus ad nostra usque tempora Sigeus Lapis in Troade, sexcentis licet ante Christum annis positus, quem multa et exquisita eruditione a se illustratum, inter *Antiquitates Asiaticas* suas edidit Patrum aetate Edmundus Chisfullus Anglus:

*Phanodici sum, Filii Hermocratis Proconesii, &c.*

Transiit proculdubio a Graecis mos iste ad Romanos; ex quibus Ennius, doctissimus ille



## P R A E F A T I O.

ac celebratissimus Latinorum Vatum Pater, sic per Statuam suam loquitur et gloriatur :

*Accipite, ô Cives, senis Enni imagin' formam:*

*Hic vestrûm panxit maxima facta Patrum.*

*Nemo me lacrumeis decoret, nec funera fletu*

*Facsit. Quur? Volito vivu' per ora virûm.*

His breviter praenotatis nemo jam mirabitur, multo minus vero damnabit, quod Maximum et Optimum Regem nuper Equestri Statua Colosfica ornatum a Senatu et Populo Olisiponensi, Lusitanos et quosvis alios Spectatores per Statuam ipsam adloquentem inducam de Se ac de Rebus suis. Ipso enim die, quo in splendidissima totius Lusitaniae Panegyri dedicata apud Regium Forum Negotiale est Statua ipsa; hoc est, octavo Idus Junias anni verentis MDCCLXXV. laeta ac jucunda mihi in mentem subiit cogitatio, de celebrandis publico Monumento aliquo, et memoriae prodendis tanti Regis Operibus, supra laudem omnem ingentibus atque admirandis.

Ex omni porro Monumentorum genere nullum succurrebat, quod vel praesenti Dedicationi esset conformius, vel occasione ad scribendum inde natae convenientius; quam si ea, quae propter spatii brevitatem nonnisi ad-

mo-



## P R A E F A T I O.

modum contracte describi in Statuae Basi poterant ; fufius quidem et plenius Regis nomine, et adfumpta quodammodo Regis Persona, Statua ipfa per Profopopoeiam eloqueretur atque enarraret. Quae ut etiam non ex memoria, fed tamquam de fcripto recitare videretur Vocalis Statua ; Tabulas aeneas vel marmoreas confinxi fex , tamquam ad ejus latera vel e regione duabus Columnis utrimque adfixas ; quae certo ordine et delectu quodam Res diverfi temporis et argumenti complecterentur.

Scilicet totidem aeneis Tabulis incidi Rerum fuarum Breviarium a fe fcriptum , moriens testamento mandavit Auguftus Caefar , ut in fine Hiftoriae ipfius diferte Suetonius testatur. Totidem incifum non aeneis , fed marmoreis Tabulis in Sebaftео Ancyrano , quod Templum erat Augufto ipfi dicatum a Galatis , poft annos mille et feptingentos magno Divinae Providentiae beneficio , parique totius Reipublicae Litterariae emolumento , Ancyrae reperit , defcripfit , et cum Orbe erudito communicavit *Joannes Pittonus Tournefortius* , qui initio hujus faeculi decimi octavi juffu et peculio Ludovici Magni Gallorum Regis Orientem peragravit.

At-

## P R A E F A T I O.

Atque hinc quidem *Monumenti Ancyrani* nomen huic Breviario obtigit.

Qui itaque non ita pridem *Parallelismum Augusti Caesaris et Josephi Magnanimi Lusitanorum Regis* Lusitano sermone evulgaram, in quo Regis ipsius Acta carptim quidem, sed tamen satis adcurate, Historicum magis quam Oratorem agens enarravi: Ipse paullo post rem exteris Hominibus gratissimam, et nostris haud inutilem me facturum existimavi; si Latinum Breviarium, quale Romanis concinnarat Augustus, conscriberem; in quo Augustum etiam in hoc aemulari visus, Res a se praeclare gestas, egregiaque in totam Lusitanam Gentem Merita, quasi aeneis vel marmoreis Tabulis ad perpetuitatem et perennitatem Nominis sui incidenda Rex noster exponeret. Tale autem est, quod sequentibus Tabulis comprehensum legat, quisquis id genus Scriptis delectetur.

TABULA PRIMA.  
*ORDO RERUM GESTARUM,  
ET ELOGIUM  
MARCHIONIS POMBALIENSIS.*

ANNO MDCCL. PRIDIE CALENDAS AUGUSTI, QUO DIE FATO CONCESSIT PATER, LUSITANUM ADEPTUS REGNUM, PRIMUM OMNIUM QUIDEM EO ANIMUM ADPLICUI: UT DISJECTIS FACTIONIBUS, QUIBUS FOEDE DISTRACTA ATQUE DISCERPTA ERAT AUCTORITAS REGIA, MAIESTATEM AC DIGNITATEM REGII NOMINIS IN SE COLLIGEREM, ET QUODAMMODO REDINTEGRAREM: DEINDE UT CLASSE ET EXERCITU COMPARATO, QUANTUM ET QUALEM LUSITANIA NUMQUAM VIDERAT, OMNIA IN TUTO PONEREM: DEINDE UT INTERNO EXTERNOQUE COMMERCIO PUBLICAS ET PRIVATAS OPES AUGEREM: DENIQUE UT TEMPESTIVIS LEGIBUS, OPTIMISQUE DISCIPLINIS, RUDES ET AGRESTES MORES AD CIVILITATEM ET MELIOREM FRUGEM REDUCEREM. IN HIS VERO OMNIBUS SIVE DECERNENDIS, SIVE ORDINANDIS, SIVE EXEQUENDIS, ADMINIS-

C TRO



TRO ATQUE ADJUTORE PRAECIPUO ET PENE SOLO USUS SUM SEBASTIANO JOSEPHO CARVALLIO DE MELLIO, SACRORUM SCRINIORUM MAGISTRO PRO REGNI NEGOTIIS. QUEM AB IPSO STATIM PRINCIPATUS EXORDIO VASTI ANIMI, PRUDENTISSIMI CONSILII, ET ACERRIMAE DEXTERITATIS EXPERTUS; AD HAEC UBI URGERENT NEGOTIA, VIGILIAE ET LABORIS SUPRA QUAM CREDI POTEST PATIENTISSIMUM; TUM VERO SINGULARIS IN ME OBSERVANTIAE ET IMMOBILIS FIDEI: PRIMUM QUIDEM COMITEM OERIENSEM, MAGISTRORUMQUE AB SCRINIIS SACRIS PRINCIPEM; DEINDE MARCHIONEM POMBALIENSEM CREAVI: IN HIS VERO QUAE AD AERARII ET CONIMBRICENSIS ACADEMIAE ADMINISTRATIONEM PERTINENT, VICARIUM ETIAM MEUM SUMMO ABSOLUTOQUE IMPERIO.

## TABULA SECUNDA.

### *POLITICA ET DOMESTICA.*

ANNO REGNI NONO FERE INEUNTE, DYNASTARUM TRIUM INSIDIIS ADPETITUS, MANIFESTOQUE NUMINIS BENEFICIO CONSER-

SERVATUS , SAEVISSIMO ATQUE IGNOMINIOSISSIMO IN EOS SUPPLICII GENERE PRO DELICTI ATROCITATE ANIMADVERTI JUSSI. JESUITAS OMNIUM FLAGITIORUM DEDECORE COOPERTOS, AD EXTREMUM AUTEM DE CONJURATIONIS SOCIETATE CONVICTOS, PULSOS REGNO IN ITALIAM ABEGI. IPSORUM ORDO UT PENITUS DE CHRISTIANA ECCLESIA EVELLERETUR, PRIMUS A ROMANO PONTIFICE ENIXISSIME POSTULAVI.

QUUMQUE JESUITARUM DELUSUS PRAESTIGIIS EO USQUE PROCESSISSET CLEMENS DECIMUSTERTIUS, UT TALEM EXTINGUI ORDINEM PASSURUM SE UMQUAM, PALAM ET SAEPE NEGARIT; INSUPER FRANCISCUM ALMADICUM DE MENDOCIA EA, QUAE AD TANTUM CONFICIENDUM NEGOTIUM PERTINEBANT, IMPIGRE MEO NOMINE URGENTEM NON PRO DIGNITATE REGII ORATORIS HABUERIT: COACTUS INJURIAS PROPULSARE, QUIBUS REGIA AUCTORITAS PETEBATUR, PHILIPPUM CARDINALEM ACCIAOLIUM LEGATUM EJUS DE LUSITANIA EXPULI. EODEM ANIMATUS SPIRITU SUBDITIS MEIS OMNIBUS CONVICTU ET COMMERCIO ROMANORUM PENITUS INTERDIXI. BULLAM COENAE, QUAM VOCABANT,  
IN-

INDICEMQUE LIBRORUM PROHIBITORUM, TAMQUAM REGIIS JURIBUS INSULTANTES, IN PERPETUUM REJECI. NOVAM REGIORUM CENSORUM CURIAM OLISIPONE INSTITUI, CUI ILLUD PRAESERTIM CURAE ESSET, UT SUPPRESSIS LIBRIS PRAVAE NOXIAEQUE DOCTRINAE, II TANTUM IN LUSITANIA LEGERENTUR, QUI ET MORIBUS UTILES, ET RELIGIONI AC REIPUBLICAE PRAESIDIO FORENT. NE AUTEM SUB EO RERUM STATU NECESSARIIS CARERET GREX CHRISTI, EPISCOPOS LUSITANOS PRO ABSOLUTA ET SUPREMA ILLA POTESTATE, QUAE IPSORUM ORDINI DIVINO JURE EST ADNEXA; TUM MATRIMONIORUM INTER SE CELEBRANDORUM CONSANGUINEIS ET ADFINIBUS GRATIAM FACERE; TUM CETERA OMNIA ECCLESIASTICAE DISCIPLINAE CAPITA PLENISSIME ADMINISTRARE PERMISI.

INTERIM OBLATAS A ROMANIS CONDITIONES PACIS MULTAS ET VARIAS, TAMQUAM INHONESTAS ET INIQUAS, PER ANNOS OCTO CONSTANTER RESPUI: DONEC CLEMENTE DECIMOTERTIO VITA FUNCTO, SAPIENTER A SUCCESSORE EJUS CLEMENTE DECIMOQUARTO RESARTA VETUS SCISSURA EST; PRIMUM QUIDEM MISSE IN LUSITANIA-



TANIAM TAMQUAM PACIS SEQUESTRO PONTIFICIO LEGATO INNOCENTIO DE COMITIBUS; DEINDE GRAVISSIMA CONSTITUTIONE EDITA DE JESUITARUM ORDINE PENITUS ABOLENDO ET EXTIRPANDO. QUAM CONSTITUTIONEM AB INCLITIS QUOQUE GALLIAE, HISPANIAE, ET UTRIUSQUE SICILIAE REGIBUS, COMMUNI EFFLAGITATIONE VEHEMENTER ETIAM ATQUE ETIAM EXPETITAM; INCREDIBILE DICTU EST, QUANTA LAETITIA, QUANTOQUE OMNIUM ORDINUM PLAUSU EXCEPERIT LUSITANIA.

ANNO MDCCLIX. SANCTIUS CONSILIUM, QUO PUBLICA NEGOTIA EXTRA ORDINEM REFERRI SOLENT, DIU QUIDEM APUD NOS INTERMISSUM ET PENE NEGLECTUM, DIFFICILLIMIS TEMPORIBUS RESTITUENDUM RATUS, QUINQUE OMNINO EO ADLEGI: FRANCISCUM DE SALDANIA PATRIARCHAM OLISIPONENSEM; JOANNEM COSMAM ARCHIEPISCOPUM EBORENSEM; JOANNEM INFANTIS FRANCISCI PATRUI MEI FILIUM; JOANNEM EMMANUELEM DE NORONIA MARCHIONEM TANCENSEM; JOSEPHUM ANTONIUM LUPUM BARONEM COMITEM ORIOLANUM. MAGISTROS VERO SACRORUM SCRINIORUM, UBI IN SANCTIUS CONSILIUM

CONVENISSENT, SEDENDI HONORE ET SUFFRAGII JURE ORNAVI.

QUUM AD ANNUM AETATIS QUADRAGESIMUM SEPTIMUM MASCULAM PROLEM EX REGINA CARISSIMA CONJUGE MARIA ANNA VICTORIA NULLAM SUSCEPISSEM; MARIAM BRASILIAE PRINCIPEM QUATUOR FILIARUM MAXIMAM, DIE NATALI MEO VIII. IDUS JUNII, ANNO MDCCLX. INFANTI PETRO FRATRI MEO DESPONDI. EX QUO MATRIMONIO QUUM ANNO SEQUENTI XII. CALENDAS SEPTEMBRIS PRIMUS MIHI NATUS NEPOS ESSET JOSEPHUS; HUNC PRINCIPIS BERIENSIS TITULO ORNATUM, SEPTENNEM CULTISSIMIS AC PROBATISSIMIS MORIBUS INFORMANDUM TRADIDI EMMANUELI A COENACULO VILLABOANO, FRANCISCANORUM TERTII ORDINIS MODERATORI.

INTEREA EX PATRICIIS NOVOS VICE-COMITES CREAVI DUOS: MESQUITELLENSEM ANTONIUM SOSANUM DE MACEDO; VILLANOVANUM A CASTANETO REGIO FRANCISCUM ALMADICUM DE MENDOCIA. NOVOS COMITES CREAVI DECEM: RESENDIANUM ANTONIUM JOSEPHUM CASTRIUM; BOBADELLANUM GOMESIUM FRERIUM ANDRADIVM; ALBANUM LUDOVICUM MASCAREN-

NI-

NIAM ; LUMIARENSEM CAROLUM CARNE-  
RIUM DE SOSA ; EGANUM EMMANUELEM  
DE SALDANIA ALBUQUERQUIUM ; CUNIA-  
NUM ANTONIUM ALVARESIUM A CUNIA ;  
SAN-PELAGIANUM ANTONIUM A SANCTO  
PELAGIO DE MELLO CASTRIUM ; OERIEN-  
SEM SEBASTIANUM JOSEPHUM CARVAL-  
LIUM DE MELLO ; AZAMBUJENSEM ANTO-  
NIUM ROLLINUM MAURANUM ; LOSAMI-  
CUM JOANNEM ALENCASTRUM. ASSECA-  
NUM VERO VICE-COMITEM MARTINUM  
CORREAM SADIUM , TITULO IPSO RETEN-  
TO , COMITIBUS HONORE ET PRAEROGATI-  
VIS AEQUAVI. NOVOS MARCHIONES CREAVI  
QUATUOR : TANCENSEM JOANNEM EMMA-  
NUELEM DE NORONIA ; ALVITENSEM JOSE-  
PHUM ANTONIUM LUPUM ; CASTEL-MELIO-  
RENSEM JOSEPHUM VASCONCELLIUM DE  
SOSA ; POMBALICUM SEBASTIANUM JOSE-  
PHUM CARVALLIUM DE MELLO. DUCIS TI-  
TULO ET HONORIBUS UNUM ORNAVI JO-  
ANNEM CAROLUM BRIGANTINUM , LAFO-  
NIENSIS DUCIS MINOREM FRATREM.

MULTOS ETIAM DE PLEBE OPTIME DE  
ME AC DE REPUBLICA MERITOS NON SO-  
LUM NATALIBUS RESTITUI , SED ETIAM AD  
SENATORIUM EVEXI ORDINEM : IN HIS JO-  
SE-



SEPHUM FRANCISCUM A CRUCE ALAGUANUM , ET EJUS FRATREM JOACHIMUM IGNATIUM A CRUCE SOVERALLIUM.

## TABULA TERTIA.

### *BELLICA ET MILITARIA.*

**B**ELLUM SEMEL OMNINO GESSI , ET QUIDEM PROVOCATUS , ANNO MDCCLXII. QUO IN BELLO QUUM COLLECTO EX LUSITANIS ET FOEDERATIS ANGLIS EXERCITUI IMPERATOREM PRAEFECISSEM SUMMO IMPERIO COMITEM LIPPENSEM , MILITARI GLORIA IN GERMANIA CLARISSIMUM ; TANTUM QUIDEM SUB EJUS DUCTU PROFECIT DIU ALIAS INEXERCITATUS MILES , UT MAIORI DAMNO BELLUM FUERIT INFERENTIBUS , QUAM PROPULSANTIBUS. ITAQUE DECIMO MENSE , QUAM IN LUSITANIAM INVASERANT , PACEM HISPANI AB EO PETERE SUNT COACTI , QUAM ULTRO SUPERIORI ANNO CONSTANTEM ABRUPISSENT.

REBUS ITA COMPOSITIS , QUAE PRAECEPTA DE RE AC DISCIPLINA MILITARI JUSSU MEO CONSCRIPSERAT LIPPENSIS COMES , EA TYPIS COMMISSA OBSERVARI IN  
POS-

POSTERUM JUSSI. NUMERUM LEGIONUM  
ITA MULTIPLICAVI, UT SUBINDE DIMISSIS,  
QUI PRAE MORBO VEL AETATE MINUS VA-  
LERENT, LECTISSIMUS SEMPER IPSO PACIS  
TEMPORE IN PROMPTU ESSET EXERCITUS  
TRIGINTA ARMATORUM MILLIUM; QUOD  
AD MEMORIAM AETATIS MEAE NUMQUAM  
IN LUSITANIA VISUM FUERAT. SINGULIS  
VERO LEGIONIBUS CERTA OPPIDA, UNDE  
PRO TEMPORE SCRIBENDA SUPPLEMENTA  
ESSENT, ADSIGNAVI. STUDIUM REI TOR-  
MENTARIAE BELLORUM DESUETUDINE PE-  
NE EXTINGTUM RESTITUI. AERARIAM OF-  
FICINAM PRO OMNI ARMORUM GENERE  
FABRICANDO, QUAM CONDIDERAT PA-  
TER, PLUSQUAM QUADRUPLO AMPLIAVI.  
BARTHOLOMAEUM COSTIUM LUSITANUM,  
QUOD ET NOVAM TORMENTORUM PERFO-  
RANDORUM RATIONEM INVENERAT, ET  
ME MIRA ARTE AC FELICITATE EX AERE  
FUDERAT, SPLENDIDISSIMIS MILITIAE IN-  
SIGNIBUS ET DUPLICI STIPENDIO HONES-  
TAVI.

MILITI STIPENDIUM AUXI. OLISIPONEM  
VALIDIORI EQUITUM AC PEDITUM PRAESI-  
DIO CINXI. ARCEM ELVENSEM NOVO MU-  
NIVI PROPUGNACULO. CLASSEM QUOQUE,  
E QUAN-

QUANTAM SUPERIORES REGES NUMQUAM AEDIFICARANT, COMPARAVI. NAVIGATIONEM OMNIBUS MODIS PROMOVI.

BRASILIAM MISSIS EO EXERCITATISSIMIS COPIIS TUTIOREM AB EXTERORUM INCURSIONIBUS REDDIDI: MISSIS CIVIUM COLONIIS AD CULTURAM AGRORUM INFLAMMAVI. RES ASIANAS NOVA CIVILIUM ET MILITARIUM ADMINISTRATIONE PRAESCRIPTA, AD MELIOREM STATUM REDUXI. ARCEM MAZAGAMICAM IN AFRICA, VITIORUM OMNIUM SENTINAM; MUTUI ATQUE INTERNECINI ODII GRAVEM CAUSAM A MULTIS RETRO TEMPORIBUS EXISTENTEM; AC PROINDE IMPENSAE MAGIS QUAM GLORIAE PER DUO SAECULA CONSERVATAM, ULTRO PENITUS EVERTI. PERCUSO DEINDE CUM MAROCHIANIS FOEDERE, MARE A PRAEDONIBUS PACAVI.

## TABULA QUARTA.

### *COMMERCIUM ET RES NEGOTIALIS.*

COMMERCIO ADMINISTRANDO NOVUM COLLEGIUM NEGOTIATORUM PRAEFECI: PROPAGANDO NEGOTIALES SOCIETATES IN-  
STI-



STITUI QUATUOR. PRIMAM OMNIUM PARAHENSEM ET MARANONIAM ANNO MDCC-LV. IN QUAM JESUITARUM INSTINCTU VERBO ET SCRIPTO TEMERE INVECTOS QUOSDAM, ASPERRIME INCREPITOS EXILIO MULTAVI. ALTERAM PORTUCALENSEM PRO VINIS DURII SUPERIORIS ANNO MDCCLVI. IN QUAM QUUM ETIAM JESUITIS AGENTIBUS GRAVITER TUMULTUATA FUISSET PLEBECULA, MISSE QUI IN SEDITIOSOS INQUIRET JOANNE PACCECO PERERIA SENATORE PALATINO, MULTOS VERBERIBUS ET EXILIO, MULTOS CAPITALI SUPPLICIO ADFECI. TERTIAM PERNAMBUCANAM ANNO MDCC-LVII. QUARTAM PISCARIAM IN ALGARBIIS ANNO MDCCLXXIII.

AD HAEC COMMERCII ANGOLANUM NEGLIGENTIA ET AVARITIA PRAEFECTORUM MISERE LABEFACTATUM DENUO ORDINAVI. ONERARIIS AD QUAESTUM NAVIBUS LIBERUM COMMEATUM QUAVIS ANNI TEMPESTATE ESSE JUSSI. NEGOTIATORUM ORDINEM, NE IN SORDIDIS HABERETUR MERCATURA, VARIIS INGENUITATIS INSIGNIBUS ET AMPLISSIMIS PRIVILEGIIS HONESTAVI. QUOSDAM EX HIS ETIAM TOPARCHIIS ET ARCIUM PRAEFECTURIS SPLENDIDISSIMIS

MIS AUXI. COMMERCII PROVEHENDI CAUSA  
PORTORIA IMMINUI. COLLEGIO NEGOTIA-  
TORUM PUBLICUM LUDUM ARITHMETI-  
CUM ; SENATUI URBANO PUBLICUM DEPO-  
SITUM ADNEXUI.

PRAETEREA OFFICINAS BOMBYCINO-  
RUM , LANIFICIORUM , LINEORUM , LEPO-  
RINORUM , VITREORUM , TESTACEORUM ,  
FERRAMENTORUM , MULTAS OLISIPONE ,  
CAVEAE JULIANAE , PORTALEGRII , NABAN-  
TIAE , POMBALII , ALCOBASSAE , ET ALIBI  
CONSTITUI. PEREGRINIS MERCIBUS MO-  
DUM IMPOSUI. AURI ATQUE ADAMANTIUM  
FODINIS , EXTREMO PATRIS PRINCIPATU  
EXACTIONUM SAEVITIA ET COLONORUM  
DESERTIONE NIMIUM QUANTUM ATTENUA-  
TIS , PRAESENTANEAM ATQUE EFFICACEM  
OPEM TULI. SACCHARI ET TABACCI TUM  
CULTURAM , TUM DISTRACTIONEM , TEM-  
PESTIVIS PROVIDENTIIS MULTO FACILIO-  
REM AC QUAESTUOSIOREM REDDIDI. LEGE  
DE ERADICANDIS CISTAGANIS VINETIS , ET  
ALTERA DE COLENDIS TRANSTAGANIS LA-  
TIFUNDIIS , REM FRUMENTARIAM MIRE  
PROMOVI.

SED ET URBANORUM AC PROVINCIA-  
LIUM QUAESTORUM MALE FIDAM ADMINI-  
STRA-

STRATIONEM PERTAESUS, REGIAM GAZAM OMNEM ROMANO MORE, ET NOVO IN LUSITANIA EXEMPLO, UNUM IN AERARIUM CONTULI. HUIUS SUPREMA PRAEFECTURA PRIMUM OMNIUM ORNAVI COMITEM OERIENSEM, SEBASTIANUM JOSEPHUM CARVALLIUM DE MELLO: CUJUS ETIAM OPERA RATIONEM ACCEPTI ET EXPENSI IN CODICES REFERENDI MULTO ADCURATIOREM AC TUTIOREM, QUAM QUAE ANTEA OBTINEBAT, IN AERARIUM IPSUM INVEXI.

## TABULA QUINTA.

### *LEGES, STUDIA, ARTES.*

LEGIBUS NOVIS LATIS EXOLESCENTIA ANTIQUIORUM REGUM INSTITUTA REVOCARI, ET FUGIENTIA JAM EX NOSTRO CONSPECTU BEATORUM TEMPORUM EXEMPLA IMITANDA PROPOSUI. QUAECUMQUE HIS CONTRARIA SIVE IN MORES, SIVE IN FORUM DEGENER AETAS SUBSECUTA INVEXERAT, PARTIM CORREXI, PARTIM SUSTULI. ET LEGIBUS QUIDEM DE VERA ET SOLIDA RATIONE INTERPRETANDARUM LEGUM; DE GENUINO EARUM SENSU PER SENATUS-



CONSULTA DETERMINANDO ; DEQUE ROMANO JURE IN SUBSIDIUM TANTUM ADHIBENDO ; PATRIAM JURISPRUDENTIAM FIXI. LEGIBUS SUMPTUARIIS LUXUM SPONSALITIAE SUPPELLECTILIS , ET COENARUM NIAMIAM LAUTITIAM IN NUPTIIS COARCTAVI: RHEDA INSIGNIORI ALIA , QUAM DUOBUS EQUIS JUNCTA, VEHI QUEMQUAM PROHIBUI. LEGIBUS VERO TESTAMENTARIIS IMMODICAS DONATIONES AD CERTAM CONTRAXI SUMMAM: PIORUM LEGATORUM ABUSUM ET FRAUDEM COMPRESSI: CLERICORUM ET MONACHORUM AVARITIAE FIBULAM IMPOSUI : LAICORUM TENUES FORTUNAS MULTUM JUVI. ALIA PRAETEREA MULTA SANXI DE MONASTERIIS VIRORUM AC FOEMINARUM SUPRA MODUM MULTIPLICATIS IMMINUENDIS ; DE SPONSALIBUS RITE CELEBRANDIS ; DE INDIS ET AETHIOPIBUS SERVIS IN LIBERTATEM ADSERENDIS ; DE HIS QUI HEBRAEI GENERIS VANIS RUMORIBUS TRADUCEBANTUR , AD CIVILIA OFFICIA ET ECCLESIASTICOS GRADUS ADMITTENDIS ; DE FAMILIIS PATRITIIS NULLO INTER SE DISCRIMINE MARITANDIS.

QUINETIAM PRO CONTINENDIS IN OFFICIO CIVIBUS, TUENDAQUE PUBLICA TRANQUIL-

QUILLITATE ET HONESTATE , GENERALEM POLITIAE CURATOREM CREAVI: BETHLEHEMITICAE REGIONI NOVUM PRAETOREM DEDI: CASCALIIS, AZEITAMO, MOUTAE, VILLAE VETERI, TERENAE, BARCAE, INSIGNIBUS OPPIDIS, FORANEOS QUOS VOCANT JUDICES PRAEFECI.

SUPREMA PRAETORIA ET SUPREMAS CURIAS SAEPE SAEPIUS LEGI. EO QUEMQUAM ADSCISCI, ADSCITUMVE MAGISTRATU FUNGI, NISI INTEGRIS MORIBUS ET ILLIBATAE FAMAE, NUMQUAM PASSUS SUM. SENATUM ETIAM OLISIPONENSEM, IN QUEM VETERI ET PESSIMO INSTITUTO NON ALII FERE COOPTARI SOLEBANT, QUAM QUOS IN PRAETORIIS JURI DICUNDO MINUS IDONEOS EXPERIENTIA DEMONSTRASSET, SIC TANDEM ORDINAVI; UT STATA LEGE SINGULIS TRIENNIIS URBANA IN SENATU TRACTARE JUSSERIM QUATUOR EX HIS, QUI IN PRAETORIO INVENIRENTUR OMNIUM JUNIORES.

PRAEFECTOS ET MAGISTRATUS QUOSLIBET REPETUNDARUM REOS SEVERISSIME PUNIVI. LARGITIONIBUS CORRUPTOS IGNOMINIA ETIAM NOTAVI. ROMANAS LEGES PATRIIS LEGIBUS ANCILLARI, NON DOMINA-

NARI PRAECEPI. JURA REGIA , RECEPTAS-  
QUE IN LUSITANIA CONSUETUDINES LEGI-  
TIMAS , NE PRAETEXTU QUIDEM RELIGIO-  
NIS VIOLARI A QUOQUAM PERMISI.

NOTA MIHI AETATIS MEAE INGENIA  
OMNIA MODIS OMNIBUS FOVI. ARTES ET  
DISCIPLINAS OMNES , EAS PRAESERTIM ,  
QUIBUS AD HUMANITATEM ET CIVILEM VI-  
TAM INFORMANTUR SUBDITI, INSTAURAN-  
DAS ET PUBLICE TRADENDAS PRO VIRILI  
CURAVI. EO CONSILIO PLENISSIMAM ATQUE  
ELABORATISSIMAM STUDIORUM RATIONEM  
ACADEMIAE CONIMBRICENSI PRAESCRIPSI.  
EO ACADEMIAM IPSAM , COLLEGIUMQUE  
NOBILIUM ADOLESCENTUM OLISIPONE IN  
AGRO COTOVIENSI A ME CONDITUM , AM-  
PLISSIMIS REDITIBUS LOCUPLETAVI. EO RE-  
GIAM CURIAM CENSORIAM TOTI REI LI-  
BRARIAE, UNIVERSISQUE MINORIBUS SCHOLIS  
PRAEPOSUI. EO HUMANIORUM LITTERA-  
RUM PUBLICOS PROFESSORES SUPRA OCTIN-  
GENTOS PER TOTAM LUSITANIAM ET CO-  
LONIAS TRANSMARINAS CREAVI. EO NO-  
VUM COETUM ALIUM A LITTERARIO SUB-  
SIDIO DICTUM INSTITUI , QUI PECUNIAM  
HIS ALENDIS DESTINATAM , VIRITIMQUE  
PRO HONORARIIS COLLIGENDAM DE VINIS  
ET



ET CARNIBUS, CURATISSIME ADMINISTRA-  
RET. EO DENIQUE PUBLICA GYMNASIA PRO  
ARTE DELINEANDI ET ARCHITECTANDI,  
PRO SCULPTURA, PLASTICA, ET STATUA-  
RIA, OLISIPONE APERIRI JUSSI.

## TABULA SEXTA.

### *OPERA PUBLICA.*

**O**LISIPONEM CALENDIS NOVEMBRI-  
BUS, ANNO MDCCLV. IMMANISSIMO POST HOMI-  
NUM MEMORIAM TERRAEMOTU PENITUS  
FERE EXCISAM, ET SECUTO E VESTIGIO IN-  
CENDIO VORACISSIMO MAXIMA EX PARTE  
ABSUMPTAM; INTRA QUINDECIM ANNOS,  
PARTIM IMPENSA MEA, PARTIM PRIVATO-  
RUM, QUOS AD PATRIAE INSTAURATIO-  
NEM STRENUE ADGREDIENDAM ET PROSE-  
QUENDAM GRATIIS, HONORIBUS, ET PRAE-  
MIIS INFLAMMARAM; NON SINE MAXIMA  
ANIMI EXULTATIONE ET PARI GLORIAE  
SENSU, PROXIMIS HIS DIEBUS RESTITUTAM  
VIDI; ET QUIDEM MULTO ELEGANTIOREM  
AC SPLENDIDIOREM, QUAM ANTEA FUERAT;  
MULTO ETIAM PATENTIOREM, ADSCENSU-  
QUE ET DESCENSU FACILIOREM, QUAM PA-

TI POSSE VIDEBATUR URBS CIVIUM FREQUENTIA IN PAUCIS CONFERTISSIMA, ET MAXIMA EX PARTE COLLIBUS IMPOSITA.

QUAE AUTEM MEA IMPENSA FECI, HAEC SUNT OPERA. IN REGIO FORO NEGOTIALI, OMNIUM SANE QUAE IN EUROPA CELEBRANTUR PULCHERRIMO, AB ORIENTE AMPLISSIMA DOMUS EXIGENDIS PORTORIIS DESTINATA: AB OCCIDENTE ARMAMENTARIUM VASTAE MOLIS, HUICQUE ADNEXAE CURIAE TRES, ET BIBLIOTHECA PUBLICA: A SEPTENTRIONE PRAETORIUM SUPREMUM, COLLEGIUM NEGOTIATORUM, ET SENATUS URBICUS. MEDIUS HIS ARCUS MAGNIFICUS, COLUMNIS MARMOREIS TRIBUS UTRINQUE SUBNIXUS, PER QUEM A PLATEA AUGUSTA FORUM IPSUM ADITUR. AD SANCTUM PAULUM ARCUS ALTER AEQUE NOBILIS, QUO VELUT PONTE SUPERIOR URBIS REGIO TAGO COMMITTITUR. IN FORO DEPOSITI PUBLICI CIPPUS CAPITALIS MARMOREUS SPIRARUM SCULPTURA IN PRIMIS ELEGANS. AD VETUS FORUM PISCARIUM HORREUM PUBLICUM. AD SANCTUM LAZARUM VALETUDINARIUM PUBLICUM, MAXIMA QUAEQUE PALATIA AMPLITUDINE AC SPLENDORE SUPERANS. DUCTAE HINC PAULO IN-

INFERIUS ARCUATO OPERE AD TAGUM USQUE OCCULTAE CORRIVATIONES, SUBTER QUIDEM PER MILLIARE ET AMPLIUS NAVIGABILI ET PENSILI URBE. AD SANCTUM ROCHUM DOMUS VIRGINUM PAUPERIORUM, UBI JESUITARUM ERAT PROFESSA DOMUS. IN AGRO COTOVIENSI COLLEGIUM NOBILIUM ADOLESCENTUM, JESUITARUM IPSORUM TIROCINIO SUBROGATUM. IN FORO DOMINICANO CURIA FIDEI, EIQUE PROXIMA IN VALLE AMOENISSIMA PUBLICA AMBULATIO. IN PLATEA, QUAE FORMOSA ADPELLATUR, AD PALATIUM MARCHIONIS POMBALIENSIS SCALARIA SUMPTUOSA ET MAGNIFICA, PER QUAE AD SUPERIOREM REGIONEM EDITISSIMAM, FACILLIMA GRADUUM RETRACTIONE BIGIS ETIAM VECTUS ADSCENDAT QUISPIAM.

AD HAEC URBEM ANTEA CONFERTISSIMAM ET CONFUSISSIMAM NOVIS ADDITIS FORIS PASSIM DISCRIMINAVI, INSULISQUE DISTINXI. FORUM BOARIUM VETUS, QUOD HODIE SANCTAE ANNAE DICITUR, AEQUATO SOLO LATIUS ET PULCHRIUS REDDIDI. FORUM PISCARIUM ET FORUM OLITORIUM IN COMMODIOREM LOCUM TRANSTULI. ORAM MARITIMAM NOBILI LORICA ET MULTI-



TIPLICI CREPIDINE ORNAVI. NAVALE AD OERIAS SEXTO AB URBE MILLIARIO, UBI MAXIME SAEVIEBAT MARE, TUTISSIMUM ET APRICISSIMUM EXTRUXI. PHARIS DUABUS EDITISSIMIS ET FLAGRANTISSIMIS, NE IN OBVIOS SCOPULOS NOCTU IMPINGERENT NAVES, TAGI OSTIUM ILLUMINAVI.

VIAS PUBLICAS INTRA URBEM ET IN SUBURBANIS PARTIM CORRUPTAS REFE- CI, PARTIM NOVAS APERUI. EAS VERO, QUAE AD OERIAS, AD CASCALIOS, AD COL- LARIOS DUCUNT, ANTEA NIMIUM DIFFICI- LES ET PRAECIPITIIS INFAMES; ALIBI QUI- DEM DISRUPTIS PETRIS, ALIBI CONSTRA- TIS MONTIBUS SIC MUNIVI; UT HAC IL- LAC EXPEDITE ET SINE ULLO PERICULO CONFICERE ITER POSSIT VEL MAXIMUS EX- ERGITUS.

AQUAM QUAE ADPELLATUR LIBERA, NO- VO FONTE IN RIVOS EJUS IMMISSO DUPLI- CAVI. EJUSDEM AQUAE DUCTUM COMPLURI- BUS IN LOCIS VITIOSUM EMENDAUI; ELU- VIONIBUS SORDIDUM EXPURGAVI NON SE- MEL. AQUAM EANDEM A PATRE MEO IN- CREDIBILI LABORE, NEC MINORI IMPENSA PER SENA MILLIARIA ET AMPLIUS CORRI- VATAM, SED VIX ULTRA SUBURBANA PER- DU-

DUCTAM, IN MEDIAM URBEM IMMISI. SUMPTUOSOS PONTES MULTIS AMNIBUS IMPOSUI. IN HIS ETIAM CONFLUENTEM AD ALCANTARAM, HIBERNO TEMPORE NON MINUS CIVIBUS, QUAM VILLIS ET MURIS INCOMMODUM; DEPRESSO AC DILATATO ALVEO, DUCTAQUE AD MARE PRAEALTA FOSSA, AMPLIUS EXUNDARE PROHIBUI. PROXIMUM LACUM, COENOSIS E SALO AQUIS PER AESTATEM ODORIS TETRI, ET VAPORIBUS MALIGNIS; INJECTA DESUPER MAGNA VIRUDERUM ET CAEMENTORUM EXSICCAVI.

AD EXTREMUM NEQUID PRORSUS ME IMPERANTE LUSITANIAE DEESSET AUT DECORIS, AUT ORNAMENTI; URBES EJUS DUAS, PACEM-JULIAM IN TRANSTAGANIS ET BRIGANTIAM IN TRANSMONTANIS, EPISCOPALI THRONO AUXI: INSIGNIA EJUS OPIDA QUINQUE, PENAFIELLAM IN PROVINCIA INTERAMNENSI; AVERIUM, PINHELLUM, ET CASTRUM-ALBUM IN PROVINCIA BEIRANA; PORTUM-ANNIBALIS IN ALGARBIIS; TUM URBIVM HONORE, TUM PONTIFICALI SEDE NOBILITAVI.

OB TANTA HAEC, TAMQUE PRAECLARA OPERA AC BENEFICIA, QUIBUS NON OLISIPONEM SOLUM, SED TOTAM ETIAM

H

LU-

LUSITANIAM DEMERUISSEM ; CENSUIT SENATUS POPULUSQUE OLISIPONENSIS CUM COLLEGIO NEGOTIATORUM : PONENDAM MIHI IN REGIO FORO NEGOTIATI STATUAM EX AERE EQUESTREM COLOSSICAE FORMAE THORACATAM , CRISTATAM , ET LAUREATAM : INCIDENDAM IN BASI EJUS LATINAM INSCRIPTIONEM, QUAE SUMMAM COMPLECTERETUR RERUM MEARUM : DIE NATALI MEO VIII. IDUS JUNIAS , ANNO MDCCLXXV. FREQUENTISSIMO OMNIUM ORDINUM CONVENTU ADORATIONEQUE , ET MILITARIBUS HONORIBUS INAUGURANDAM STATUAM IPSAM : POSTERO DIE POST LAETA EPINICIA A SELECTISSIMIS MUSICORUM CANTATA , ET POST CHOREAS MATRONARUM PRIMARIARUM , DANDUM IN PRYTANEO EPULUM OPTIMATIBUS ET SENATORIBUS : DIE TERTIO POST IMMISSOS IN FORUM CURRUS TRIUMPHALES SEPTEM , ET POST SALTATIONEM VIRGINUM URBANARUM , DANDUM NEGOTIATORIBUS EPULUM IN COLLEGIO IPSORUM : POPULO AUTEM IN COLLEGIO FABRUM : TRIBUS ILLIS NOCTIBUS ILLUMINANDAM FUNALIBUS TOTAM URBEM : HONORIS ET MEMORIAE ERGO PLURIMOS CUDENDOS AUREOS , ARGENTE-



TEOS , ET AEREOS NUMMOS EFIGRAMMA-  
TE HOC INSCRIPTOS : MAGNANIMO RESTI-  
TUTORI OLISIPO POST FATA RESURGENS.

QUONIAM VERO QUIDQUID IN REPU-  
BLICA VEL MAGNIFICE GESSERAM , VEL SA-  
LUBRITER INSTITUERAM ; TOTUM ID POM-  
BALIENSI MARCHIONE CONSILIARIO ATQUE  
ADMINISTRO PERFECISSEM : EJUS ETIAM  
AEREAM EFFIGIEM CUM CAESARIE ET TOR-  
QUE , STATUAE MEAE THRONO INSCULPI,  
SENATU POPULOQUE IPSO OLISIPONENSI  
CUM NEGOTIATORUM COLLEGIO DECER-  
NENTE , NON SOLUM PROBAVI , SED ETIAM  
LAUDAVI.

QEAE OMNIA ITA UTI DECRETA ERANT,  
CURANTE HENRICO JOSEPHO CARVALLIO  
DE MELLO COMITE OERIENSI , SENATUS  
URBANI PRAESIDE , ET MARCHIONIS POM-  
BALIENSIS FILIO , EO ADPARATU EAQUE  
MAGNIFICENTIA DISPOSITA SUNT , ATQUE  
IN EXECUTIONEM MISSA ; UT CELEBRITATE  
ILLA NIHIL AD HODIERNAM DIEM PUL-  
CHRIUS , NIHIL SPLENDIDIUS , NIHIL SUMP-  
TUOSIUS VIDERIT LUSITANIA.

THE UNIVERSITY OF CHICAGO  
DEPARTMENT OF THE HISTORY OF ARTS  
AND ARCHITECTURE  
OFFICE OF THE CURATOR  
OF THE MUSEUM OF ARTS  
AND ARCHITECTURE  
540 EAST 57TH STREET  
CHICAGO, ILL. 60637  
TEL. 773-936-5000  
FAX 773-936-5001  
WWW.MUSEUMOFARTS.ORG

## NOTAE AD SINGULAS TABULAS STATUAE VOCALIS.

**Q**uemadmodum Rerum ab Augusto Gestarum Monumentum Ancyranum Commentariis suis illustrarunt summi in Republica Litteraria viri, Justus Lipsius, Isaacus Casaubonus, Joannes Fridericus Gronovius, atque Edmundus Chifollus: (nam ante publicatum Tournesfortianum Exemplar, multo antiquiora alia nota erant, quamquam non ita integra, neque ita emendata:) Ita nostrum hocce ad instar illius efformatum Breviarium Rerum Gestarum Josephi Magnanimi Lusitanorum Regis, paucis et selectis Notis illustrare, visum nobis est operae pretium; praesertim ad ea capita, ubi maximi Regis sive Instituta, sive Opera, antiquorum Romanorum comparatione magis elucent.

### NOTAE AD TABULAM PRIMAM.

**V**ersu 7. *Maiestatem ac dignitatem regii nominis in se colligerem.*) Dicit de nostro Principe non minus vere, quam eleganter potest, quod de Vespasiano scripsit Suetonius: *Incertum diu et quasi vagum imperium suscepit tandem, firmavitque.* Nisi quod ante Vespasianum vacillasse ac nutasse imperium dicitur *Rebellionem trium Principum*, Galbae videlicet, Othonis, et Vitellii: ante Josephum vero nostrum vacillabat et mutabat Regnum Factionibus Aulicorum.

Versu 17. *Ad civilitatem et meliorem frugem reducerem.*) Civilitas in Republica et Societate humana virtus praecipua in eo consistit, ut mutua nobis officia alter alteri praestemus, tamquam unius atque ejusdem corporis membra. Quare necdum in privato homine, sed vel in Principe ipso civilitatem maxime laudandam docent Politici Scriptores. Laudant certe in Augusto Suetonius; in Trajano Plinius; in Antonino Pio Capitolinus; in Alexandro Severo Lampridius.

Versu 23. *Sacrorum Scriniorum Magistro.*) Sic ex more antiquae Aulae Romanae vocat eum, quem hodie a *Sanctioribus Arcanis* vulgo dicimus. Et ante tempora quidem Joannis Regis V. unus tantum erat a *Sanctioribus Arcanis*. Extremo autem Principatu suo tres ille esse voluit pro triplici Negotiorum Publicorum Classe; unum pro Domesticis Regni; alterum pro Maritimis; tertium pro Exteris et Bellicis.



Ceterum quos hodie a *Sanctioribus Arcanis* dicimus, ii sub antiquis Imperatoribus *Magistri Scriniiorum Sacrorum* vocabantur. Et sicut pro quadruplici Classe Negotiorum, quae ad Principem referebantur, quatuor erant Scriniiorum genera; (*Scrinia Palatina*, et *Scrinia Augusta* vocat Symmachus Lib. x. Epist. 34. et 46.) ita quatuor erant *Magistri Scriniiorum Sacrorum*; unus ab Epistulis, alter a Libellis, tertius a Memoria, quartus a Dispositionibus, qui et *Comes Dispositionum* dicebatur, quemadmodum et eorum singuli *Principes Scriniiorum*.

De his vero frequens occurrit mentio, tum apud Scriptores Historiae Augustae, ut apud Spartianum in Aelio Vero cap. 8. et apud Lampridium in Alexandro Severo cap. 26. Tum in Codice Juris Civilis Tit. *De Magistris Sacrorum Scriniiorum*, et Tit. *De Proximis Sacrorum Scriniiorum*.

Constat praeterea amplissimo et splendidissimo hoc Munere sub Antoninis functos Ulpianum et Papinianum, duos illos Romanae Jurisprudentiae Principes; ad Praefecturam tandem Praetorii (qui Dignitatum omnium apex erat) inde fuisse evectos. Lege Spartianum in Pescennio Nigro cap. 7. Lampridium in Alexandro Severo cap. 26. Salmasium in Notis ad Lampridii Alexandrum cap. 32. Guntherium *De Officiis Domus Augustae*, Lib. iii. cap. 3.

Versu 28. *Ubi vero urgerent negotia.*) Tale quid de Maecenate observat Paterculus Lib. ii. cap. 88. *Vir ubi res vigiliam exigeret, sane exsomnia.*

Versu 32. *Et immobilis fidei.*) Idem epitheton Statuae Vitellii Patris adscriptum discimus ex Suetonio in Vitelio cap. 3. PIETATIS IMMOBILIS ERGA PRINCIPEM.

Versu 33. *Magistrorumque a Sacris Scriniis Principem.*) *Magistri Scriniiorum Sacrorum Intimum Consistorium Ordinarium* constituebant sub Caesaribus: unde et *Comites Consistoriani* vocantur in Codicis peculiari Titulo. Lampridius in Alexandro Severo cap. 31. *Post meridianas horas subscriptioni et lectioni Epistularum semper dedit operam, ita ut ab Epistulis et Libellis et a Memoria semper adfisterent.* Hinc designaturus latine, quem nos patria lingua vulgo dicimus, *Primeiro Ministro do Gabinete*; non minus proprie, quam eleganter *Primarium Administrum suum Secretioris Consistorii Rex* vocat *Magistrorum a Sacris Scriniis Principem*. Talis Alexandro Severo fuit Ulpianus, de quo rursus Lampridius eodem capite: *Neque unquam solum quemquam, nisi Praefectum suum vidit Alexander, et quidem Ul-*  
pia-

pianum, ex *Assessore semper suo, causa justitiae singularis. Quum autem alterum adhibuit, et Ulpianum rogari jussit.* Antea idem scripserat cap. 26. *Consiliarius Alexandri, et Magister Scriniorum fuisse perhibetur Ulpianus.* Et cap. 15. *Negotia et causas prius a Scriniorum Principibus, et doctissimis Jurisperitis, et sibi fidelibus, quorum primus tunc Ulpianus fuit, tractari ordinarique, atque ita referri ad se praecepit.*

Versu 38. *Vicarium etiam meum.) Sacra Vice Aerarii et Academiae Administratorem alias dices, ex phrasi antiquae Aulae Caesariae.* Sic in Lege 16. Cod. Theodos. *De Appellationibus, Sacra Vice judicare dicitur Praefectus Praetorii.* Et in veteri Inscriptione apud Gutherium *De Officiis Domus Augustae*, Lib. 1. cap. 25. JULIUS. NEMESIUS. NOMENTANUS. M. AURELI. IMP. SACRA. VICE. BAETICAM. GUBERN.

## NOTAE AD TABULAM SECUNDAM.

Versu 7. *Omnium flagitiorum dedecore coopertos.)* Sic Curionem *facinoribus coopertum* dixit Sallustius in *Catilina*. Alium *nefariis sceleribus coopertum* Cicero in *Verrinis*.

Versu 10. *In Italiam abegi.)* Proprium verbum, ubi quod nobis maxime est odiosum aut molestum, propellimus. Sic Ciceroni Lib. II. *De Oratore*, cap. 66. *Abigere muscas.* Suetonio in *Caligula*, cap. 26. *Fustibus omnes abigere.*

Versu 22. *Non pro dignitate Regii Oratoris habuerit.)* Habere hic est *tractare*. Terentius in *Hecyra*: *Numquam secus habui illam, ac si ex me nata esset.* Curtius de *Alexandro Darii victore*: *Virgines Regias tam sancte habuit.* Similiter *pro dignitate* idem est, ac prout aliqujus dignitas postulat. Sic Suetonius in *Augusto* cap. 38. *Urbem non pro dignitate ornatam* dixit. Sic vetus *Lapis* apud *Gruterum* CXLIX. 4. *Viam multis locis intermissam* PRO. DIGNITATE. IMPERII. P. R. *latiore longioreque factam* commemorat. Sic vetus *Inscriptio* in *Sym-machi Praefecti honorem posita* apud *Juretum*: PRO DIGNITATE TANTI ORDINIS MAGNITUDINEM LOCI EJUS IMPLERIT.

Versu 71. *Quo publica negotia extra ordinem referri solent.)* Publica Negotia, et Publica Consilia dicunt Latini, quae nos vulgo dicimus Negotia Status, et Consilia Status. Suetonius in *Tiberio* cap. 55. *Viginti sibi e numero Principum civitatis depoposcerat, veluti consiliarios*  
in

*in negotiis publicis.* Augustus in Monumento Ancyrano : EX EO. DIE. QUO. DEDUCTI. SUNT. IN. FORUM. UT. INTERESSENT. CONSILIIIS. PUBLICIS. DECREVIT. SENATUS. Loquitur de duobus Nepotibus Caio et Lucio.

Versu 73. *Difficillimis temporibus restituendum ratus.*) Occasione quippe expulsum Jesuitarum, natiq; inde cum Romanis dissidii, gravia ac salebrosa multa tractari communiter oportebat.

Versu 75. *Quinque omnino eo adlegi.*) Viginti pro negotiis publicis in consilium sibi adhibuisse Augustum, memoriae prodit Dion Libro LVI. Totidem Tiberium Suetonius cap. 55. Galba quoque, eodem Suetonio teste cap. 10. adfectis et nutantibus imperii rebus consulturus, *e primoribus prudentia atque aetate praestantibus, velut instar senatus, ad quos de maiore re quoties opus esset, referretur, instituit.* Antiquos igitur Caesares, Augustum praesertim, Auctores atque Institutores habet Sanctius Consilium hodiernorum Regum; quod in Hispaniam quidem primus invexisse traditur Carolus Quintus; in Lusitaniam vero Rex Sebastianus.

Versu 97. *Hunc Principis Beriensis titulo ornatum.*) Etiam morem hunc, quo Liberos et Nepotes suos, qui sibi in imperio successuri creduntur, *Principum* titulo ornare solent plerique hodie in Europa Reges; originem duxisse crediderim a veteri Aula Imperatorum Romanorum, in qua et *Caesares*, et *Principes Juventutis* honoris gratia adpellari solebant Filii vel Nepotes Caesarum, qui vivis adhuc Parentibus aut Avis, Successores imperii destinabantur. Et primos quidem utroque honorario titulo ornatos lego Caium et Lucium, Nepotes Augusti ex Marco Agrippa et Julia, de quibus in Ancyrano Lapide haec Avus ipse adnotata reliquit: CAIUM. ET. LUCIUM. CAESARES. HONORIS. MEI. CAUSA. SENATUS. POPULUSQUE. ROMANUS. CONSULES. DESIGNAVIT. EQUITES. AUTEM ROMANI. UNIVERSI. PRINCIPEM. JUVENTUTIS. UTRUMQUE. EORUM. PARMIS. ET. HASTIS. ARGENTEIS. DONATUM. APPELLAVERUNT. De iisdem Nummum producant Torrentius et Chisullus ita inscriptum: C. L. CAESARES. AUG. F. COS. DESIG. PRINC. JUVENT. Post hos Caligula, ut habet Suetonius cap. 18. *Fratrem Tiberium die virilis togae adoptavit, adpellavitque PRINCIPEM JUVENTUTIS.* Capitolinus in Aelio Vero: *Nostris temporibus à Vestra Clementia* (Dio-cletianum adloquitur) *Maximianus atque Constantius CAESARES dilecti sunt, quasi quidam Principum Filii, et designati Augustae Maiestatis Heredes.*

Ver-



Verſu 135. *Multos etiam de plebe et natalibus reſtitui, et ad Senatorium evedi ordinem.*) Natalibus reſtitui a Veteribus ICtis is dicitur, qui a Principe in ingennitatem adſeritur, et quaſi primaevo Hominum ſtatui redditur. Quo multo adhuc ſplendidius et honorificentius eſt in Senatorium adſciſci ordinem; utpote cujus tanta apud Romanos dignitas erat, ut Senatorum ordinem paſſim vocitent Romani Scriptores *ampliſſimum*, ut Cicero in Oratione *pro Cluentio*, et Lex 21. D. *De Legat.* Senatores vero *clariffimos* haberi et dici voluerit Alexander Severus, teſte Lampridio in ejus vita cap. 21. Unde *Clariffimatus Dignitas* poſtea inveſta aevo Conſtantini, de qua Ammian. Marcell. Lib. xxi. cap. 31. Et in Lege 5. Cod. *De Proximis Sacror. Scriuior.* Fuit autem haec antiquorum Caefarum cura praecipua, ex plebeis *novos Homines* facere, ex novis Hominibus *Patricios* adlegere; quod de Julio Caefare aperte tradit Suetonius cap. 41. de Auguſto Dion Caſſius Libro Lii. de Veſpaſiano Aurelius Viſtor in *Caefaribus*. Atque ex his unus fuit Marcus Tullius Cicero, quem nullis natalibus commendatum ad ſummam Conſulatus Dignitatem provexit inſignis morum probitas, et ſingularis in dicendo facundia.

## NOTAE AD TABULAM TERTIAM.

Verſu 1. *Et quidem provocatus.*) Spectat hoc ad juſtitiam belli, quemadmodum illud Suetonii de Auguſto cap. 21. *Nec ulli genti ſine juſtis et neceſſariis cauſis bellum intulit.* His cauſis intervenientibus *juſtum piumque bellum* dicebant Romani, ut ex Livio aliisque notum.

Verſu 23. *Leſtiſſimus ſemper exercitus.*) Sic *Leſtiſſimus Vir* Ciceroni Verrina iii. cap. 6. *Leſtiſſimus Juvenum* Statio Lib. v. Silv. i.

Verſu 38. *Et me mira arte ac felicitate ex aere fuderat.*) Plinius Lib. xxxiv. cap. 8. *Theodotus, qui Labyrinthum fecit Sami, ipſe ſe ex aere fudit.* Ars autem et felicitas Luſitani Statuarii in eo eluxit, quod octo minutorum ſpatio una atque eadem fuſura inſidentem equo Regem expreſſit, nulla vel minima deficiente particula aut naturae, aut ornatus.

Verſu 40. *Splendidiffimis militiae inſignibus et duplici ſtipendio honeſtavi.*) Similiter Coloſſi Neroniani Refectorem *inſigni congiario*, magnaue mercede donavit Veſpaſianus, ut apud Suetonium legimus cap. 18.

Verſu 52. *Miſſis Civium Coloniais.*) Digna ſemper maximis Prin-

Principibus cura, deductio Coloniarum vel in Provincias, vel in transmarinas Regiones. Augustus in Breviario Ancyrano: COLONIAS. IN AFRICA. SICILIA. MACEDONIA. UTRAQUE HISPANIA. IN GALLIA. COMATA. ET. GALLIA. NARBONENSI. PRAETER PRAESIDIA. MILITUM. DEDUXI. Erant igitur Coloniae aliae militares, aliae civiles. Utrasque hic designat Augustus. Utrasque Augustum imitatus designat et Rex noster.

Versu 57. *Vitiorum omnium sentinam.*) Metaphora a sentina in navibus, quo sordes omnes defluunt. Cicero in Catilinam II. 4. *O fortunatam Rempublicam, si quidem hanc sentinam ejecerit.* Usurpat etiam Sallustius in Catilina.

### NOTAE AD TABULAM QUARTAM.

Versu 2. *Collegium Negotiatorum praefeci.*) Dicitur hic *Collegium Negotiatorum*, quemadmodum apud Romanos Scriptores, et in veteribus Lapidibus passim legas *Collegium Augurum*, *Collegium Pontificum*, *Collegium Praetorum*, *Collegium Fabrorum*, *Collegium Centonariorum*.

Versu 9. *Pro vinis Superioris Durii.*) *Superior Durius*, ut *Mare Superum* Ciceroni; *Superior Germania* Suetonio.

Versu 25. *Negotiatorum Ordinem.*) Sic *Ordinem Senatorium*, et absolute *Ordines* dicebant Romani, quoties de diversis civium Classibus sermo erat. Suetonius in Augusto cap. 41. *Liberalitatem omnibus ordinibus exhibuit.*

Versu 26. *Ne in sordidis haberetur Mercatura.*) Sicut apud Romanos habebatur *Lege Claudia*, et *Lege Julia*, et *Lege 3. C. De Commerciis et Mercatoribus*. Quo spectat et illud Suetonii in Vespasiano cap. 16. *Negotiationes quoque vel privato pudendas propalam exerceuit, coemendo quaedam tanti, ut pluris postea distraheret.*

Versu 44. *Fodinis nimium quantum attenuatis opem tuli.*) Abrogata *Lege de Capitatione*, ut vocabant, quam extremo Patris Principatu ab eo extorserant Aulicorum quorundam consilia improvida, et male sana.

Versu 51. *Lege de eradicandis Cistaganis vinetis rem frumentariam mire promovi.*) Parem Legem eadem de causa, et eodem fine tulit Domitianus, de quo ita scribit Suetonius cap. 7. *Ad summam quondam ubertatem vini, frumenti vero inopiam existimans nimio vinearum studio negligi arva, edixit, nequis in Italia novellaret; atque*

*in Provinciis vineta succiderentur, relicta ubi plurimum dimidia parte.* Hinc vero servatum videtur sub Imperatoribus sequentibus, ut promiscui non esset juris vitem instituere; sed eorum tantum, qui a Principe veniam impetrassent. Vopiscus in Probo, cap. 18. *Gallis omnibus et Hispanis ac Britannis hic permisit, ut vites haberent, vinumque conficerent.* Eutropius de eodem: *Vineas Gallos et Pannonios habere permisit.* Quae duo loca nobis indicasse magnum Casaubonum non dissimulamus.

Versu 56. *Sed et Quaestorum male fidam administrationem pertaesus.*) Hac ipsa de causa, opinor, aut simili, curam Aerarii a Quaestoribus ad Praetores transfudit Augustus, teste Suetonio cap. 36. Hinc *Praetores Aerarii* memorat Tacitus Annal. Lib. 1. cap. 75. et *Praetores Aerarios* Frontinus Libro altero *De Aquaeductibus*.

Versu 59. *Romano more in unum Aerarium contuli.*) Romano more, stante quidem Republica. Nam sub Caesaribus et Aerarium erat, et Fiscus; Aerarium Populi Romani, Fiscus Principum. Apertissimum ac notissimum id ex Suetonio cum pluribus locis. Ut in Augusto capite extremo: *Quantum pecuniae in Aerario et Fiscis.* Et in Vespasiano cap. 16. *Compulsus summa Aerarii Fiscique inopia.* Augustus ipse utrumque non obscure innuit, ubi in Ancyrano Monumento scribit: QUATER. PECUNIA. MEA. JUVI. AERARIUM. Quo spectat et vetus Nummus Gentis Viniciae cum hac Inscriptione: S. P. Q. R. IMP. CAES. AUG. QUOD. V. M. S. EX. EA. P. Q. IS. AD. A. DE. Hoc est, *Quod viae munitae sunt ex ea pecunia, quam is ad Aerarium detulit.*

Versu 61. *Hujus Suprema Praefectura.*) Praefectum Aerarii memorant Tacitus Annal. Lib. v. cap. 8. et Gellius Lib. vi. cap. 23. Vetus etiam Lapis apud Gruter. MXXVIII. 5. C. PLINIUS. L. F. CAECILIUS PRAEF. AERAR. SATURNI.

Versu 64. *Rationem accepti et expensi in Codices referendi.*) Rationarios hujusmodi Codices et Romani Principes habebant, curabantque quam diligentissime. Suetonius in Augusto cap. 28. *Rationarium Imperii* vocat: in Galba cap. 16. *Breviarium Rationum.* Quo sensu et *Breviarias Rationes* dicit Scaevola Ictus Lege ult. *De Peculio Legato.*



## NOTAE AD TABULAM QUINTAM.

**V**ersu 1. *Legibus novis latis exolefcentia antiquiorum Regum Instituta revocavi, et fugientia jam ex nostro conspectu beatorum temporum Exempla imitanda proposui.* Sumpta haec omnia, paucis mutatis, ex Ancyrano Monumento, ubi ita profatur Augustus: *Legibus novis latis exempla maiorum exolefcentia revocavi, et fugientia jam ex nostro conspectu avitarum rerum exempla imitanda proposui.* Ita enim pulcherrimum locum partim ex fide excisi Lapidis, partim ex conjectura syllabas et litteras omnes, quae superfuerant, sagaciter aucupanti, restituit doctissimus *Antiquitatum Asiaticarum* explorator Edmundus Chisullus.

Versu 15. *Luxum sponsalitiaie supellectilis, et nimiam coenarum lautitiam in Nuptiis coarctavi.)* Sumptuarias Leges Romanorum, atque in his Fanniam et Liciniam, diligenter percenset Gellius Lib. II. cap. 24. Nequis itaque miretur, eo curas suas demisisse tantum Principem, ut Rei etiam Cibariae, Vestiariae, et Vehiculariae modum praescripserit; audiat quid de Julio Caesare tradat Suetonius cap. 43. *Leſticarum uſum, item conchyliatae veſtis, et margaritarum, niſi certis perſonis et aetatibus, perque certos dies ademit. Legem praecipue ſumptuariam exercuit, diſpoſitis circa macellum cuſtodibus, qui obſonia contra vetitum retinerent, deportarentque ad ſe; ſubmiſſis nonnumquam liſtoribus atque militibus, qui ſiqua cuſtodes feſelliſſent, jam adpoſita e triclinio auſerrent.* Nihilo autem in privatorum lautitiis coercendis ſegniores fuiſſe reliquos Caesarum, diſces ex iis, quae Suetonius ipſe memorat de Tiberio cap. 34. et de Nerone cap. 16.

Versu 46. *Suprema Praetoria et Supremas Curias saepe saepius legi.)* Proprium verbum, atque ea quidem in re Latinis Scriptoribus pene unicum, *Legere*. Adhibetur autem, quoties e Magistratuum ordine in unamquamque Curiam eos adlegit Princeps, quos propriis muneribus obeundis maxime idoneos judicat, indignis vel minus habilibus submotis. Hoc sensu Augustus in Ancyrano Breviario: **SENATUM. TER. LEGI.** Livius Lib. XI. cap. 51. *Censores fidei concordia Senatum legerunt.* Paterculus Lib. II. cap. 89. *Senatus sine asperitate, nec sine severitate lectus.* Suetonius in Augusto cap. 35. *Senatorum adfluentem numerum ad modum pristinum et splendorem redegit, duabus lectionibus.*

Versu 49. *Nisi integris moribus, et illibatae famae.)* Quanta  
mo-

morum integritate, quantaque religione esse debeant, qui Juri dicundo admoventur a Principe, insigniter docet sequens locus Suetonii de Augusto cap. 35. *Quo autem lecti probatique religiosius Senatoria munera fungerentur, sauxit, ut priusquam consideret quisque, thure aut mero supplicaret apud Aram ejus dei, in cujus templo coiretur.* Eodem consilio illud quoque Romanis moribus institutum, quod nostris pariter receptum est; ut qui in Senatum optarentur, palam jurarent, numquam se nisi ex Legum praescripto sententiam laturos. Tacitus Annal. Libro 1. cap. 74. de Tiberio agens: *Ad quod exarsit adeo, ut rupta taciturnitate proclamaret, se quoque in ea causa laturum sententiam palam, et juratum.* Suetonius de eodem cap. 34. *Siquem reorum elabi gratia rumor esset, subitus aderat, Judicesque Legum et religionis admonebat.* Justinianus Lege 14. Codicis *De Judiciis*: *Cui non est cognitum, antiquos Judices non aliter judicialem calculum accepisse, nisi prius juramentum praestitissent, omnino se cum veritate et Legum observatione judicium disposituros.*

Versu 62. *Repetundarum Reos severissime puniri.*) Suetonius de Julio Caesare, cap. 43. *Ius laboriosissime ac severissime dixit. Repetundarum convictos etiam ordine Senatorio movit.* Legem ea de re Caesar ipse instauravit, quae ab eo *Julia De Repetundis* dicitur. Primam enim *De Repetundis* instituerat Lucius Piso Frugi, ut ex Ciceronis Verrina vi. et Libro *De Officiis* iii. discimus. Sed et Lege xii. Tabularum gravissime puniri solitos Judices Arbitrosve, qui ob rem dicendam pecuniam accepissent, observat Gellius Lib. xx. cap. 1. Lamprius de Alexandro Severo cap. 17. *Referebat Encolpius, quo ille familiarissimo usus est, illum si unquam furem Judicem vidisset, paratum habuisse digitum, ut illi oculum crueret: tantum odium eum tenebat eorum, de quibus apud se probatum esset, quod fures fuissent. Adit Septimius, qui vitam ejus non mediocriter executus est, tanti stomachi Alexandrum fuisse in eos Judices, qui furtorum fama laborassent, etiamsi damnati non essent; ut si eos casu aliquo vidcret, commotione animi stomachi choleram evomeret, toto vultu inardescente, ita ut nihil posset loqui.*

Versu 63. *Largitionibus corruptos etiam ignominia notavi.*) Aliud est poena, aliud ignominia. Nam poena vel damnum irrogat, et tunc proprie multa dicitur; vel dolorem infert, et tunc quoque supplicium adpellatur. Ignominia vero nominis tantum nota est, quod honestatis nomen habere desinat is, qui ignominia notatur. Isidorus Orig. Lib. v. cap. 27. Hinc pulchre apud Nonium Cicero *De Republica* Lib. iv.

*Censoris iudicium nihil fere damnato adfert, praeter ruborem. Itaque ut omnis ea judicatio versatur tantummodo in nomine, animadversio illa ignominia dicta est.*

Versu 86. *Professores supra octingentos.*) Sic Vespasianus teste Suetonio, *primus e Fisco Latinis Graecisque Rhetoribus annua centena constituit.* Sic Antoninus Pius, teste Capitolino, *Rhetoribus et Philosophis per omnes Provincias et honores et salaria detulit.* Sic denique Alexander Severus, teste Lampridio, *Rhetoribus, Grammaticis, Medicis, Mathematicis, Mechanicis, Architectis salaria instituit, et Auditoria decrevit.* Adde, si lubet, Tit. Cod. *De Studiis Liberalibus Urbis Romae et CPnae.*

### NOTAE AD TABULAM SEXTAM.

**N**otaturus aliquid de magnificis sumptuosisque Operibus, quae Pombalienſi Marchione Conſiliario et Adminiſtro impigre adgreſſus eſt, feliciusque perfecit Rex Joſephus: Nihil opportunius praemittendum arbitror, quam quod de Caligula magna ſemper atque ardua audente ſcripſit Suetonius cap. 37. *In extruccionibus nihil tam efficere concupiſcebat, quam quod poſſe effici negaretur.* ET JACTAE ITAQUE MOLES INFESTO AC PROFUNDO MARI, ET EXCISAE RUPES DURISSIMI SILICIS, ET CAMPI MONTIBUS AGGERE AEQUATI, ET COMPLANATA FOSSURIS MONTIUM JUGA, INCREDIBILI QUIDEM CELERITATE. Sed pergo jam ad Notas ſingulares.

Versu 23. *Omnium ſane quae in Europa celebrantur pulcherrimo.*) Clauſum illud a Meridic Oceano, a tribus lateribus Regiis Curiis, Parallelogrami formam exhibet, longum palmos DCCCLXX. latum palmos DCCCXXX. Eminent vero in medio Statua Regis Equeſtris, marmoreo Perystilio ſuperpoſita, ſummaque tectorum faſtigia excedens: ut quod de Trajani Foro ſcripſit Caſſiodorus Lib. vii. Epist. 6. *Trajani Forum vel ſub adſiduitate videre miraculum eſt*; id non minus vere de Oliſiponenſi hoc noſtro dixerit, qui ſaepius ingreditur.

Versu 25. *Domus exigendis portoriis deſtinata.*) Portoria ſunt vectigalia, quae pro peregrinis mercibus ſolvuntur. Suetonius in Julio Caefare cap. 43. *Peregrinarum mercium portoria inſtituit.*

Versu 28. *Et Bibliotheca publica.*) Hanc primus omnium Luſitanorum Regum extruendam, et Codicibus undique conquiſitis locupletandam curavit Joſephus I. Adnexa autem eſt Regiae Curiae Cenſo-



soviae, ut Romana illa Augusti Templo Apollinis; et illa Alexandrina Ptolemaei Philadelphi Museo doctorum virorum, qui publico sumptu alebantur.

Versu 46. *Subter navigabili et pensili urbe.*) Sumptum ex Plinio Lib. xxxvi. cap. 18. ubi de Cloacis agit a Tarquinio extructis.

Versu 63. *Urbeim antea confertissimam et confusissimam.*) Talis Roma ante Neronem. Vide Casaubonum ad illud Suetonii in Julio cap. 41. *Per dominos insularum egit.*

Versu 65. *Insulisque distinxi.*) *Insulas* Latini vocant series domorum a ceteris omni ex parte discretas ac separatas, ut insulas in medio mari. Quae vox hoc significatu frequens Historiae Augustae Scriptoribus, Tacito, Suetonio, Capitolino, et aliis. Vetus Memoria apud Reinesium Class. iv. Inscrip. 2. INCENDIUM. IN. CAPITOLIO. INSULAE. DUAE. ABSUMPTAE. Quorum imitatione et nos patria lingua *Ilbas* dicimus domos hujusmodi, nullo modo aliis contiguas.

Versu 79. *Vias publicas.*) Curam de muniendis et reficiendis viis publicis passim in Caesaribus Romanis commendant Lapidēs ac Nummi. Ut ille Gentis Viniciae, quem in Notis ad Tabulam Tertiam jam dedimus cum Inscensione tali: S. P. Q. R. AUG. CAES. QUOD. V. M. S. EX. EA. P. Q. IS. AD. A. DE. Hoc est, *quod viae munitae sunt ex ea pecunia, quam is ad Aerarium detulit.* Ex Lapidibus unum Emeritae ipsi Augusto dedicatum producimus ex Grutero cXLIX. 4. IMP. CAES. DIVI. F. AUGUSTUS. ORBE. MARI. AC. TERRA. PACATO. TEMPLO. JANI. CLUSO. REP. P. R. OPTIMIS. LEGIBUS. ET. SANCTISSIMIS. INSTITUTIS. REFORMATA. VIAM. SUPERIORUM. CONSULUM. TEMPORE. INCHOATAM. ET. MULTIS. LOCIS. INTERMISSAM. PRO. DIGNITATE. IMPERI. P. P. LATIOREM. LONGIOREM. QUE. GADEIS. USQUE. PERDUXIT. Capitolinus de Antonino Philosopho cap. 11. *Vias etiam urbis atque itinerum diligentissime curavit.*

Versu 90. *Aquam quae adpellatur Libera.*) Sic Romanis *Aqua Martia*, *Curtia*, *Caerulea*, *Virgo*, *Alfietina*

Versu 92. *Ejusdem Aquaeductum.*) Hunc quidem a Joanne Rege V. inchoatum, continuatum, et tantum non absolutum, antiquis Romanorum sive difficultate operis, sive impensa, sive magnificentia nihilo inferiorem dixeris. Laudatissimos vero antiquae Romae Aquaeductus non aliunde melius agnoscet quispiam, quam e Julii Fron-

tini Opere *De Aquaeductibus*, quod et veterum Codicum fide emendatissimum, et uberrimis Notis illustratum nuper cum Litterario Orbe communicavit Joannes Polenus Professor Patavinus.

Habemus e Patini Museo Nummum Claudii sic inscriptum: TI. CLAUD. DRUSI. F. CAES. AUGUSTUS. GERMANICUS. S. P. Q. R. P. P. AQUAS. CLAUDIAM. EX. FONTIBUS. QUI. VOCANTUR. CAERULEUS. ET. CURTIUS. A. MILLIARIO. XXXV. ET. ITEM. ANIENEM. NOVAM. A. MILLIARIO. XXXII. SUA. IMPENSA. IN. URBEM. PERDUCENDAS. CURAVIT. COS. V.

Extat et Romae Inscriptio Tito dicata hoc titulo: IMP. T. CAES. DIVI. F. VESPASIANUS. AUG. AQUAS. CLAUDIAM. ET. ANIENEM. PERDUCTAS. A DIVO. CLAUDIO. ET. POSTEA. A DIVO. VESPASIANO. PATRE. SUO. URBI. RESTITUTAS. CUM. A. CAPITE. AQUARUM. A. SOLO. VETUSTATE. DILAPSAE. ESSENT. NOVA. FORMA. REDUCENDAS. SUA. IMPENSA. CURAVIT.

Versu 123. *Ob tanta haec tamque praeclara opera ac beneficia.*) Ubique gentium collata in Rempublicam et subditos beneficia amplifsimos honores et titulos pepererunt magnis Regibus. A beneficiis quidem *Soterem*, hoc est, Servatorem Antiochum; *Evergetem*, hoc est, Benefactorem Ptolemaeum dixerere Graeci. A beneficiis solidam Columnam e marmore viginti pedum Julio Caesari adhuc viventi dedicarunt Romani cum hac Inscriptioe: PARENTI. OPTIME. MERITO. A beneficiis PATREM PATRIAE, CUSTODEMQUE IMPERII ROMANI, iidem consecrarunt Augustum. A beneficiis post mortem in DIVOS retulerunt Graeci Successores plerosque Alexandri Magni; Romani plerosque Caesarum suorum; utrique vero etiam Heroes suos. Nam ut pulchre magis, quam pie argumentabatur Plinius Libro II. Naturalis Historiae, cap. 7. *Deus est mortali juvare mortalem, et haec ad aeternam gloriam via. Hic est vetustissimus referendi benemerentibus gratiam mos, ut tales numinibus adscribantur. Quippe omnium aliorum nomina deorum ex hominum nata sunt meritis.*

Versu 126. *Censuit Senatus Populusque Olisp.*) Senatus proprium verbum *Censere*, ut quum ex aliis passim monumentis, tum ex sequenti maxime Inscriptioe planum fiet, quam Romae se legisse testatur Achilles Staius noster in Notis ad Suetonii Illustres Grammaticos: HUIC. SENATUS. AUCTORE. M. AURELIO ANTONINO AUG. ARMENIAC. PARTHIC. MAXIMO. GERM. SARMAT. STA-

STATUAM. PONI. HABITU. CIVILI. IN. FORO. DIVI. TRAJANI. PECUNIA. PUBLICA. CENSUIT.

Versu 129. *Statuam ex aere Equestrum colossicae formae.*) Antiquis Statuae erant et *Equestres* et *Pedestres*. De Equestribus Plinius Lib. xxxiv. cap. 5. *Equestres utique Statuae Romanam celebrationem habent, orto sine dubio a Graecis exemplo.* De utrisque Lapis Pisanus, quem egregiis Notis explicavit Norisius: SUPER. ARCUM. STATUA. PEDESTRIS. IPSIUS. TRIUMPHALI. ORNATU. SUPERQUE. EAM. DUAE. EQUESTRES. INAURATAE. CAI. ET. LUCI. CAESARUM. STATUAE. PONANTUR. Quod ad *Colossas Statuas* adtinet, colossicam Neronis memorat Plinius Lib. xxxiv. cap. 7. colossicam Vespasiano oblatam Suetonius cap. 23. De aliis insignis locus est apud Lampridium in Alexandro Severo cap. 28. *Statuas colossas vel pedestres nudas, vel equestres, Divis Imperatoribus in Foro Divi Nervae locavit omnibus cum titulis, et columnis aereis, quae gestorum ordinem continerent exemplo Augusti.* Spartianus quoque in Aelio Vero cap. 7. *Statuas Aelio Vero per totum orbem colossas poni iussit Adrianus.* Utrobique *Colossas* in antiquis Codicibus legi observat magnus Salmasius, pro quo alibi *Colossas*, alibi *Colossicas* offendas.

Versu 134. *Die natali meo.*) Natalis Principum dies nulli non genti celebratus ludis, spectaculis, conviviis, aliisque laetitiae ac venerationis signis, de quibus accurate agit Censorinus in aureolo Libello *De Die Natali*. Porro natalis dies Principis celebrabatur non solum vitae, sed etiam imperii, ut ex Spartiani Adriano, et ex Capitolini Pertinace constat. Adde Constitutionem Valentis, Theodosii, et Arcadii A A A. vii. C. *De Feriis*. Et alteram Leonis et Anthemii, C. De eodem, ubi *Certamen Circense in ortum aut natalem Principis* memoratur.

Versu 142. *Dandum in Prytaneo Epulum.*) Et hoc ex veterum instituto, praesertim Graecorum, qui *Prytaneum* vocabant urbis locum, Consilii, Epulisque publicis destinatum; in quem ad coenam invitare solebant Legatos Regum, et Hospites quosvis honoratiores; et ubi etiam publico sumptu alebantur Cives de Republica praeclare meriti. Diserte id nos docet Titus Livius Lib. xli. cap. 20. ubi de Perseo Macedonum Rege agens haec memoriae prodit: *Cyzici in Prytaneum, id est, penetrare urbis, ubi publice, quibus is honos datus est, vescuntur, vasa aurea mensae unius posuit.* Meminit et Cicero in *Oratore*, cap. 54. ubi in *Prytaneum* admitti quemquam vescendi cau-



fa, in maximis Graecorum honoribus habitum esse testatur. Hinc in *Prytanei* usum vasa et ceteram supellectilem multi donabant. Ut Pharnodius ille in Sigeo Lapide antiquissimo apud Chisullum in Antiquitatibus Asiaticis pag. 5. *Craterem, et crateris Basin, et Colum.* Et Parfernus Rheginus in Lapide alio apud Gruterum CLXIV. 7. *Trullam argenteam anaglyptam, et Pelvem aeneam.*

Versu 148. *In Collegio Fabrum.*) Pro *Fabrorum*: syncope passim obvia non solum in Lapidibus, sed etiam in Scriptis Ciceronis, et optimi cujusque; ut *sestertium, nummum, talentum*, pro *sestertiorum, nummorum, talentorum*. Cicero in Oratore cap. 46. *Fabrum et Procum audeo dicere*, non *Fabrorum et Procorum*. Plinius tamen Lib. x. Epist. 42. *Collegium Fabrorum* dicere non dubitavit ad Trajanum scribens, ut et Paneg. cap. 54.

Versu 152. *Cudendos aureos, argenteos, et aereos nummos.*) Sic quum terrae motu prostratas duodecim Asiae Civitates Tiberius restituendas curasset, Nummus publicatus est cum Inscriptione: CIVITATIBUS ASIAE RESTITUTIS. Neque ullum fere vel illustre facinus edebant Romani Imperatores, vel insigne beneficium in Rempublicam conferebant; quin percussus statim Nummus rei memoriam ad posteros transmitteret. Ut ille Augusti cum Inscriptione: CIVIB. ET. SIGN. MILIT. A. PARTHIS. RESTIT. Cujus generis amplam segetem dabit Patinus inter Additamenta Suetoniana.

Versu 160. *Ejus etiam aeream Effigiem Statuae meae Throno insculpi.*) Maius quiddam et honorificentius hoc est, quam quod Saturnino Secundo, Intimi Consistorii Administro a Memoria, Statuam sub auro constitui jusserunt Valentinianus et Valens, insignia viri in se et in Rempublicam merita apud posteros commendaturi. Inscriptionem, qualis Romae legitur, talem exhibet Gutherius *De Officiis Domus Augustae* Lib. III. cap. 3. SATURNINO. SECUNDO. V. C. PRAESIDI. PROVINCIAE. AQUITANIAE. COMITI. ORDINIS. PRIMI. INTRA. CONSISTORIUM. MAGISTRO. A. MEMORIA. ET. QUAESTOR. PRAEF. PRAETORIO. ITERUM. OB. EGREGIA. EJUS. IN. REMPUBLICAM. MERITA. DD. NN. VALENTINIANUS. ET VALENS. VICTORES. AC. TRIUMPHATORES. SEMPER. AUGUSTI. STATUAM. SUB. AURO. CONSTITUI. LOCARIQUE. JUSSERUNT.

Versu 168. *Curante Henrico (Josepho Carvallio de Mello.)* Notari honoris ergo in publicis Monumentis debuit nomen clarissimi ac generosissimi Juvenis; quo simul Praeside, Impulsore, et Curatore, tan-

tos

tos honores Augustissimo Regi suo statuit atque adparavit Senatus Populusque Olisiponensis. Sic publicis Actis *Consulum* nomina adscribebant Romani ; *Archontum* Athenienses ; *Ephororum* Lacedaemonii ; *Cosmorum* Cretenses.

